

Meung Man 2014 Num Jung Pwi Mai Grawng Nyiex Ma, Carang Pwi Meung

Pwi Haktiex Viex Tau Uik

Yam Koh Ti Teei Carang Pwi Meung



MAIX LO TI TAWNG CEU PA TIX



LOX NAWB

Tang meung man pa mawh meung rom, ex pa mawh pa giex kwang plak krax ot pwi mai riang rao pwi haktiex, pa koe daux lum ting dee Num giex kaing ting, ex thong bung ka cub caw khankix mai ex teei carang jung pwi mai grawng nyiex khankix khawm carang pwi meung jah 2014 num khix loe (30) ngaix tom hoek khix pon (18) ngaix mai sang laig ti teei ka daux meung man khawm ku dah ku dee heue. Can pwi meung pa koe ku dah ku dee ku kaux ku pwi rom ti teem yuh tau ka daux krax grum rhawm, ex tom khiox khaw ka pwi khawmuik heue. Mawh kheu hoik rheung num pa ang ex lai koe krax yaox krax mhong, sonsang sawg ti tawng grawng carang pwi meung kaux mawx kaux an, mawh beeh glawm pwi khawmuik heue.



Mawh kheu jao beeh glawm in pa hoik tiiem ti deuh plak piang tin, ex tom tiiem lai grawng an tix mu, pa mawh lai pa ah, “Lo Maix Ti Tawng Pa Tix” heue. Can pwi pa koe beeh glawm ka daux kaing in kix khankix khawmuik, sawg ti tawng ka grawng can pa koe daux lai in khaix hoik phat ti tawng chix ti shiao awm pa lo ti shiao ka heue.

Sonsang lih koe phuk lai in can kix pa teem ex yuh, pa mawh can kix pa sawg mau khri son jung pwi daux (Lum Kam Pha) lum num ting piang meung haktiex pa kok ceu kaux kix mawh (UNFPA) kawx ting bwan son heue. Awm can kix pa mawh cub caw pa thong bung kaing plak kaing krax kwang daux lum simian giex kaing pa mawh pwi yuh kaing lum khankix ang ah, can kix pwi ting pa yuh kaing daux kaung daux meung pa mawh pwi pa ting beeh glawm ku kaux ang ah, mai can pwi ceu ku ceu pa koe ka daux meung man ku dah ku dee ang ah ex kiied ting bwan son mai ex mhai ti deuh kaing pa hoik yuh in uik ka daux lai mhai heue.

Tak sang kieh meung man mawh meung pa haok huan kaux cong kheu pa rom ex ti khrex rien kaing jung pwi mai grawng nyiex mai carang pwi meung in kieh khaw caw grum naog son sang koe pa haok huan pa grum rhawm daux meung khraox meung man daux bawg yam pa sang hoek hu sivoe ngai sax kieh ex tok taix paox tix rom ti yuh tau ka daux pa mawh rhawm rhi tix mu.

Tax Khin Yi

Simiang Giex Kaing Meung Rob Rom

Cub Caw Pa Khrex Krax Ot Pwi Mai Riang Rao Pwi Meung

KA DAUX MEUNG MAN 2014 NUM JUNG PWI MAI GRAWNG NYIX MAI CARANG PWI MEUNG



▲
2013 num khix pon son sang koh ti tee
carang, lox chawk pwi koh carang ka cao giex
kaing nyiex ma tix kaux, Yax Tawie Tawie U

MAIX LO TI TAWNG CEU PA TIX

1. Lox Jah	3
2. Jung Pwi Mai Grawng Carang Pwi Meung Sang Ah Ka Pa Tix	4
3. Mawh Sang Teei Ka Carang Pwi Mawx Lie?	5
4. Mawh Dee Mawx Pa Sang Rieb Teei Ka Carang Pwi Meung Lie?	7
5. Sang Koh Ti Teei Carang Lai Mawx, Sang Rheung Mie Glang	8
6. Mawh Sang Koh Ti Teei Carang Kieh Hoik Yuh Ka Mawx?	9
7. Been Hawt Jawh Son Carang Pwi Meung	10
8. Jung Pwi Mai Grawng Nyiex Carang Pwi Meung Phan Hoik Teei Ka Carang Pwi Meung Sang Tawx Ka Ceu Kaing Pa Yuh Ka Mawx	12
9. Kaing Pa Dha Cox Khrex Son Carang Pwi Meung	15
10. Plak Cie Maix	17
11. Plak Been Sitoe	18
12. Lox Chawk Son Carang Pwi Meung Daux 2014 Num Meung Man	19
13. Deeh Plih Pwi Tawng Grawng Carang Pwi Meung	23
14. Simin Pa Shiang Mai Carang Pwi Meung Daux Meung Man 2014 Num	24
15. Lox Ghoik	26

1. Lox Jah



Carang Pwi Meung Daux Meung Man, Ghoik Ti Teei Daux 1983 Num Mai Hoik Lheu (30) Num Pai: Heue.

Meung man pa mawh meung rob rom in sang jah ti koh teei carang pwi meung mai grawng nyiex ka daux 2014 num khix loe (30) ngaix tom hwe khix pon (18) ngaix heue. Khaix hoik ghoik ti teei carang pwi meung 1983 num mai yam in hoik lheu (30) num heue. Son sang koe krax haok huan kaux cong ka daux meung haktiex ex, phan ang pon ka carang pwi meung kriem kre ang chix, mawh pa lo tete heue. Son sang tiag cheu krax ot pwi meung (Lum Kam Pha) Lum Num ting piang meung haktiex tawx krax keut kieh yuh carang pwi meung (10) num tix bawg heue. Ex pon ti tawng grawng pa koh Lum Num ting meung piang haktiex (Lum Kam Pha) carang pwi meung (200) meung ka daux 2005 num heue.

Meung man in 2014 num jung pwi mai grawng nyiex carang pwi meung an mawh pa koe bwan son son kaing pa sang bak ti yuh hu sivoe ngai sax, can pa koh ti teei carang an khankix jung pwi mai lhang nyiex pa mawh krax ot pwi, pa shiang plak lah lai, grawh grawng ceu kaing kaing khankix, pa deeh tieh loh krax ot krax koe meung man, yam in khaix in hu sivoe ngai kaing krax haok huan ku ceu mawh pa sang mhawm son krax kwang mai mawh pa koe bwan son pwi meung khawmuik heue. Son sang haok huan krax ot krax koe pwi haktiex mai son sang chix tat ti deuh been kwang mai kaing ceu pa bak ti yuh hu sivoe ngai khankix, mawh kheu nan kiied lo ka carang pa khaw pa caw mai pa krup bawg yam mai pa grum naog ceu kaing khankix heue.

Krax pa grum mhawm pa koh ti teei carang pwi meung an, mawh pa tiag ti yaog ka pa grawm ceu

▲ 2013 num khix pon son sang koh ti teei carang, lox chawk pwi koh carang ka cao giex kaing nyiex ma tix kaux.
(Riang- Lum kam pha(Lum num ting piang haktiex, cub caw pa sawg mau khri / Pyi Caw Myit/Benny Manser)

kaing pa shiang mai carang an khankix heue. Son sang pon ti teei ka ceu kaing tom grum naog, lo ka pa grum naog lox pawk pwi meung ka lox chawk pwi teei carang heue. Khaix hoik tawng pwi haktiex ka grawng kaing in khankix, mai khaix hoik rom ti yuh tau, ex tom chix pon ka ceu kaing pa grum pa mhawm heue. Son sang chi rom pwi meung pwi haktiex ti yuh kaing in tau, kix lo ti tawng grawng pa koe bwan son kaing in yuh ka mawh heue. Mawh kheu nan pwi meung khankix lo ti tawng sidawng ka grawng kaing son carang pwi meung in, can kaing in kix mawh pa kiied ting ceu son kaing ceu pa teei carang pwi meung heue. Lai pa jhi daux krax in, mawh pa keut ti yuh son pa sitoe tau, son cao giex kaing khankix, mai son pwi haktiex khankix, son sang thawk ti krai grawng carang pwi meung ka pwi tang kaux son sang tawng pwi khawmuik grawng kaing in sidawng heue. Phan kawn baox simie ti tawng ka grawng in, hu ti chawk ka pwi ting pa koe beeh glawm daux kaing carang pwi meung pa koe daux lum pa dex mai dee ot maix heue.

2. Jung Pwi Mai Grawng Carang Pwi Meung Sang Ah Ka Pa Tix



Jung pwi mai carang pwi meung pa ah nan, mawh pa koh ti teei carang pwi haktiex khawmuik mai krax lah lai pwi meung mai grawng ceu pa dex mai can ceu an khankix pa teei carang, pa kraix khrawm, pa sawn carang, pa tiag cheu ti yaox, pa plih ti kieh tawng mai can kaing pa shiang ka an khawmuik heue. Ka daux bawg yam pa koh ti teei carang pwi meung an, can kix pwi koh ti teei carang khankix, kix sang teei carang jung pwi mai lhang nyiex, koe diag mie ding, pa prung prang dee ot jung pwi, pa kraix khrawm jung pwi, mai can pa shiang mai ceu kaing an khankix heue.

Son sang pon ti tawng carang krax ot jung pwi meung haok huan mie ding, grawng pa tieh loh krax ot pwi meung, grawng pa haok huan krax lah lai mie ding, tom teei carang pwi num (10) num tix bawg heue. Can ceu grawng kaing pa pon khaing carang pwi meung mawh son sang haok huan meung simian vawng, mai son sang rom ti yuh kaing cub pa shiang mai veng khankix, mai kaing cub caw plak praix khankix, son sang kaux cong been pa hawt jawh daux meung mai son sang kaux cong kaing pa sum kaing khraox ku ceu heue. Phan krai lox tiag meung vawng koe kawn nyawm cawng gau lai tom nie, mai phan hoik pon tawng ka carang kawn nyawm pa hoik koe ju (5) num mawh caw ti sum nyiex cawng mie mu, caw ti sum dee mawx, sara/max, cao gau caw ti koe mie kaux, mai kaing tang ceu khankix, pon ti tawng kheu carang pwi meung heue. Awm an kaing ceu pa teem plak sidah kaing teem plak rawm nyaux, kaing pa tawx rieang ngu sah mai can kaing tang ceu khankix.

Son can kaing an khankix lo pa sang lang ceu kaing khankix heue. Ka daux meung man khaix hoik teei carang pwi meung daux 1983 num, mawh kheu jao grawng ku ceu, ex ang lai yaox ti teei carang pwi meung , mawh kheu nan, yam in sang caw ti yuh pa cied cheu tawng, pa teei carang mai pa deuh been kwang awm pa khaw mai krax ot krax koe pwi yam in heue.



Ka daux meung man carang jung pwi, mai grawng nyiex mai pwi meung can pwi pa sang yuh lih kaing in kix cao kaing ting simiang ting khankix mai simiang jhi kaing khankix.

"Tak Sang Koh Ti Teei Carang Pwi Meung Ka Can Pwi Pa Koe Ka Daux Meung Ot Ex Khawmuik Heue."

3. Mawh Sang Teei Ka Carang Pwi Mawx Lie?

(K) Bawg yam pa tat ti deuh (2014 num khix loe (29) ngaix pon sawm) tak sang koh ti teei carang pwi pa koe ka daux meung man khawmuik heue. Ka daux pa koh ti teei carang pwi meung an, viex ka pwi pa koe daux nyiex ma khankix, cub caw khankix mai pwi pa ang koe nyiex ma khankix heue. Ang joeng mawh ngie pwi daux meung, viang pwi tang meung kawx viex nang heue.

(Kh) Can pwi pa ot daux meung tang meung (Phan ang mawh nan) kix pa yuh kaing daux meung tang meung, ex caw ti teei ceu kaing krax ot kix heue. Ceu kaing pa teei ex khaing kix an, ang mawh son pa kieh pwi koe krax lud loe, mawh son sang khrex rien carang kriem kre heue. Can pa hoik kraix khrawm tip on khaing lox chawk khankix mai jah ka meung rob rom tom hoek ka plawg mai yaong mawh pa sang jhi grawng glawg krax ot kawn pwi awm pa lih koe ka daux an heue. Ceu kaing pa yuh son in, ang lai mawh son pwi tix kaux kaux, can lox pawk pa tiiem ti deuh khawmuik, mawh pa mox tom glip mai pa ang doh kieh pwi yaox kah tix kaux kawx heue. Tak sang prie tom mox glip ka lox chawk an khawmuik, ang mawh pa kieh pwi tix kaux kawx koe krax lud loe kheu ceu an khankix heue. Mawh kheu nan pwi meung khawmuik phan chawk ka rah tix, caw ti pawk rah see khaw caw heue.

Daux Bawg Yam Pa Tat Ti Deuh Son Carang Pwi Meung, Pwi Khawmuik Sang Teei Carang Kix Awm In Pa Koe Plak Greem Heue.

(1) Lhang Nyiex Pa Koe Khankix

Daux nyiex ma pa koe khankix, pwi tix kaux (Phan ang mawh nan) pwi tix cub, kix mawh pa ot tau, lih tau heue.

(2) Cub Caw (Phan ang mawh nan) Pa Khrawm nyiex Ma Ot Tau

Cub caw (phan ang mawh nan) nyiex ma pa khrawm paox tix ot tau, ang shiang ceu cad mai khrawm ot tau, pa yuh ka paox tau ang ah, ang yuh ang ah, phan ot daux nyiex tix mu mu, pa yuh nan pa rom ti ot tau heue. Lox tiag- nyiex nyo khankix, cawng vad khankix, nyiex khrawm kwad riex ju khankix, nyiex tab ot liien khankix, nyiex thawng khankix heue.

(3) Cub Pwi Hun Pa Yuh Cub Tix Khankix

Cub in kix mawh pa ang koe nyiex ma, mawh pwi pa sawg ti ot dee klai rib dee mhawm sawm, mawh pa kawn ti jhak ka pa tieh loh cag pu mai ot daux cag pu mai pa jhak pa tieh loh reu sang paw mai ot hawt rawm khankix, pwi pa tiang hoek khaing dex meu haktiex khankix heue.

(4) Bang Dee Vai Pwi Tuk Kha Ti Ot Khankix (Temporary Shelters)

Daux bawg yam pa tat deuh son carang pwi meung an, bang dee vai pwi tuk kha ti ot khankix (Temporary shelters) pa ot ka daux in kix, tak sang sawn ti teei carang kix uik heue. Tak sang jhak ti yaox ka krax ot kix mai sang yuh kaing pa lheu mhawm khaing

an son kix mai koh ti teei carang kix heue.. Son sang pon teei carang lhang nyiex khawmuik mai carang jung pwi pa khrawm paox tix ot tau khawmuik, caw ti yuh daux krax pa grum naog pa kriem krie ka son kaing ceu an khankix heue.



Ka daux 2013 num khix pon, yam cheu ti teei carang pwi meung yam chawk pwi koh carang tix kaux ka cao nyiex tix kaux.
(Rieang – Cub pa sawg mau son kaing daux lum kam pha)

**“2014 Num Khix Loe (29) Ngaix, Can Pa Koe Daux Meung Man
Khawmuik Ang Laug Ceu Pwi, Ang Laug Dee Ot, Sang Koh Ti Teei
Carang Pwi Meung Ka Khawmuik Heue.”**

4. Mawh Dee Mawx Pa Sang Rieb Teei Ka Carang Pwi Meung Lie?



"Jah Daux 2014 Num Khix Loe (29) Ngaix Pon Sawm, Ot Maix Dee Mawx Carang Laig Tan Heue"

Daux 2014 num yam koh teei carang pwi meung, yaox pwi dee mawx teei carang nawh tan heue. Awm been pa deuh an yaox pwi dee mawx tak teei carang kix khawmuik heue. Pa teei carang pwi meung daux 2014 num in, bawg yam pa tat shiao mawh 2014 num khix loe (29) ngaix heue. Lox tiag – daux singaix pa tat ti teei carang daux khix loe (29) ngaix pon sawm an, phan yiex ying ying caw ti hu it nyiex paox grawm nawh nyiex Nanda Seng ka daux bo an, mai phan cao teei carang hu daux nyiex Yieux Nanda Seng, pwi teei carang an caw nawh ti tawng grawng pa sang

teei ka carang can kix pa koe ka daux nyiex an ku kaux khawmuik heue. Mawh kheu nan, Yieux Ying Ying tom ang lai plaik carang to kaux tix awm pa koe nawh daux nyiex tix, nawh caw ti laig carang ka daux nyiex Yieux Nanda Seng awm pa koe bawg yam pa tat ti deuh heue. Lox chawk tang ceu khankix, nawh tom tawng grawng ot nawh dee mawx jheeng jheeng heue.

Yam teem pwi Mandalay pa mawh kwad yaong pa kaux Ko Tie ka kawn dex nyiex nawh yuh lai gau daux nyiex
(Rieang – Lum kam pha cub pa sawg mau son kaing pwi /Pyi Caw Myint)

Pa yuh satix kah, bawg yam tat ti teei carang pwi meung tak sang teei ka carang can pwi pa koe ka daux meung man khawmuik heue. Kawn nyawm pa kawn keh khaix hoik teei carang pwi meung an khankix ang tau ti plaig carang kix laig ka daux carang pwi meung heue. Viang mawh nan pwi pa yum khaix bawg yam pa tat ti deuh an khankix uik (Pwi an kix khankix kheu kawn im yam teei carang) tak sang plaik carang kix laig heue.

5. Sang Koh Ti Teei Carang Lai Mawx, Sang Rheung Mie Glang

Pa koh teei carang pwi meung daux haktiex dee ot khankix tak rheung (12) ngaix heue. 2014 num khix loe (30) ngaix tom hoek khix pon (10) ngaix, sang teei carang sinax an heue.

Singaix pa ghoik ti koh teei carang pwi meung ngaix ghoik ka daux (2014 num khix pon 10 ngaix) an phan pwi koh ti teei carang khankix ang hoek ka daux nyiex maix, mai phan ang nyang kliep ti deuh lai grawng pa hoik koh ti teei carang ka daux nyiex ma maix, lo ti tawx lox ka daux lum plawg/ mai yaong pa koe dex maix heue. Son sang pon laig nyiex ma khawmuik ka daux carang pwi meung, mawh akhwang mai mawh beeh glawm pwi kaux pwi mawx kaux pwi an heue.



Ka daux 2013 num khix pon, yam cheu ti koh teei carang pwi meung pwi kah teei carang tix kaux chawk ka cao giex kaing nyiex ma tix kaux. ▲



Ka daux 2013 num khix loe mai khix pon yam cheu ti koh teei ka carang pwi meung yam hoek bleeh Daw Hla Hla Htay ka daux shiang cox pa mhawm griang mai teei carang kix.

(Rieang – Lum kam pha, cub caw pa sawg mau son riang rao jung pwi/2013/ Pyi Caw Myit) ▼

6. Mawh Sang Koh Ti Teei Carang Kieh Hoik Yuh Ka Mawx?

Ka daux yam teei carang pwi meung in, pwi teei carang pa mawh sara/max khankix, kix tak laig ti teei carang ka daux dee caw ti hu mai laig daux tix nyiex hoik tix nyiex heue. Pwi teei carang an, kix sang chawk ka cao giex kaing nyiex heue. Phan lo ti chawk son grawh grawng ti blah, kawn baox sang chawk ka pwi daux nyiex an tix kaux kaux heue. Koe ka piang jung pwi daux nyiex ma. Phan koh ti teei carang kix teu rheung (25) minit heue. Yam chawk ka cao nyiex cao pawk caw ti mawh cao giex kaing nyiex (Phan ang mawh nan) pwi ka daux nyiex tix kaux pa hoik naog ju heue. Viang mawh nan lox pawk tiblah son sang mawh lox pa rug pa kriem, sang baox chawk ka pwi tang nyiex tix nyiex heue. Mawh kheu nan yam hoek ti teei carang pwi meung an, ku nyiex ku kaux lo ti grum ot ka daux nyiex tix heue. Ka daux bawg yam pa koh ti teei ka carang pwi meung ka daux (12) ngaix an, mawh caw ti hoek ka daux nyiex pex daux singaix mawx, sang dha ti kieh cao nyiex an tawng kah heue.

Ka daux bawg yam tat ti teei carang pwi meung pon sawm an can kawn nyiex ma pa ot ka daux nyiex uik ngie khaing pa laig carang heue. Yam koh ti teei carang pwi meung, can pwi pa ang caw ti ot daux nyiex cao tix, phan nawh hoek tang dha, nawh tak laig carang dee ot nawh tan heue.


Ang tau ti chawk ka pa laig carang ang laig yam sawg ti teei ka carang pwi meung heue. Awm pa ang mhaing ti jhak ka lai lhang nyiex, ang lo ti tawx pwi koe beeh glawm mai pwi pa hoek ti teei carang ka daux nyiex maix tix kaux kawx yaox kah heue.

2013 num yam cheu ti teei carang pwi meung lox chawk pa shiao yam an.

(Rieang – Lum kam pha, cub caw pa sawg mau son kaing jung pwi/ Pyi Caw Myint)

Dee hoek pwi cheu ti teei carang pwi meung an, kix tak mhai ti deuh dee hoik koh ti teei carang ka khlip heue.

(Rieang – Lum kam pha, cub caw pa sawg mau son kaing jung pwi/ Pyi Caw Myint)



7. Been Hawt Jawh Son Carang Pwi Meung



(7.1) Can Ceu Pa Mox

Ka daux bawg yam pa teei carang pwi meung an, can ceu lox pa deeh pawk pwi khawmuik an, caw ti priex mai mox ti deuh, awm pa koe been hawt jawh daux carang pwi meung, lheu khaing pa khrex rien ti yuh carang, ang chix ti shiao son kaing tix ceu kawx heue. Pa sang ah koe yuh nin, can ceu lox pawk pa pon khaing nyiex ma khankix khawmuik, ang pon ti shiao son cub caw pa giex kaing plak jung pwi meung, mai cub liien pa kwang plak haktiex, mai pa sang koh keen haktiex (Phan ang mawh nan) pa shiao son sang pon lai kham grawng tokaux tix, mai kaing tang ceu khankix heue. Can cub pa koe beeh glawm ti kwang kia ka carang pwi meung an, ang chix ti kieh grawng lai an lih plak praix, awm pa hoik jhi daux been hawt jawh an, lo ti priex tom khaw caw heue.

Tak sang tiiem ti deuh ceu kaux can kix pwi pa sawg teei carang, ka piang lox chawk carang pwi meung tan heue. Pa ang nyang pon ti laig daux carang koe/ang koe (Phan ang mawh nan) pa lheu koh ti teei lheu khaing tix bawg koe ang koe, son sang pon cied ti tawng mhawm mhawm, tom mhai ti deuh ceu kaux kix heue. Bawg tiblah mawh teei carang kriem ang kriem, caw ti cied tawng ka ceu kaux pa mhai carang ti deuh khankix heue. Lox tiag – mawh rug hoek pwi teei carang ti teei carang daux nyiex pex lie ang hoek lie, cao cied carang tak sang chix cied tawng ka grawng an heue. Daux bawg yam pa tat ti deuh son teei carang pwi meung, nyo pa hoek ka daux nyiex maix an viang ang laig daux carang lhang nyiex maix kawx, caw ti plaik laig daux carang nyiex maix heue. Ang koe pa cied ka grawng an heue.

Daux 2013 num, khix aliah been hawt jawh pa jhi tawng grawng nyiex carang pwi meung an, mawh pa sidaing lo ka can kix pwi pa rieb krax pa chawk heue. Ka daux pa koh ti teei carang pwi meung an, phan cao giex kaing tix kaux ang pon hawt been pa deuh an, caw ti tang krai ka cub caw kawmati carang pwi meung heue.

(7.2) Pa Rom Ti Yuh Tau Ka Carang Pwi Meung In Mawh Beeh Glawm Pwi Ku Kaux Heue.

Meung man in mawh pa nab yam ka akhwang pa mhawm pwi meung khawmuik heue. Pa teem ti yuh ka pa teei carang pwi meung, pa rieb pa teei carang, pa tawx ceu pa khaw caw khankix, mawh beeh glawm pwi haktiex khawmuik heue.

Daux bawg yam pa tat ti teei carang pwi meung, can pwi pa hoek ka daux meung man khawmuik koe akhwang ti rieb tawx carang tix heue. Phan pwi teei carng tiebtie ka lhang nyiex (phan ang mawh nan) phan tiebtie ka pwi tix kaux kaux grawng ang pon teei carang pwi meung, caw ti krai doh hoek ka cao cied carang (Phan ang mawh nan) krai ka pwi ting cao giex kaing yaong khankix heue. Phan pwi an khankix ang cu ti yuh, maix chix ti mhaing kieh teei grawng awm pa koe been pa deuh son kaing prawng see heue. Can pwi meung khawmuik kawx caw ti tawx carang pwi meung mai caw ti krai lox pawk khaw caw heue. Ka daux carang pwi meung an, caw ti pawk can lox chawk pa koe khawmuik heue.

Ka daux bawg yam pa teei carang pwi meung an, can ceu grawng in pa koe plak greem khankix, mawh pa ang dex dawd mai been pa deuh son pa teei carang pwi meung mai rien rhawm tix ka mawh grawng pa ting ceu heue.

(K) Pa thiang ti ang kieh pwi teei carang pwi meung.

(Kh) Pa baox ti sau carang lheu khaing ra bawg.

(Ng) Pa tawx lox lud ka pwi teei carang.

(S) Pa tawx krax suk sag ka pwi teei carang (Phan ang mawh nan) ka pwi pa koe beeh glawm ka daux kaing an khankix.

(Sh) Pa pie lhen ti mawh pwi teei carang.



Ka daux meung man khaix hoik rheeng (30) num, pa sang yuh yam in pa mawh jung pwi mai grawng nyiex carang pwi meung (2014) yam teei carang, pwi pa rom yuh tau pa mawh cub caw pa giex kaing plak jung pwi meung, Tax Nyi Nyi mai cao yuh kaing khankix.

(Rieang – Lum kam pha, cub caw pa sawg mau son kaing jung pwi/ Pyi Caw Myint)

8. Jung Pwi Mai Grawng Nyiex Carang Pwi



Meung Phan Hoik Teei Ka Carang Pwi

Meung Sang Tawx Ka Ceu Kaing Pa Yuh Ka Mawx

Ka daux meung man 2014 num jung pwi mai grawng nyiex carang pwi meung phan hoik teei khawmuik, tak sang pon khrawm tip awn ka can ceu kaing khaing an tom nie heue. Tiblah mawh awm in plak greem heue.

- (K) Jung pwi meung dee kwang giex kaing daux meung man.
- (Kh) Jung pwi pa khrawm pwi situ ju.
- (Ng) Pa chix lai koe yuh ka mawx? (Chix tiiem lai / chix phat lai) mie ding.
- (S) Glawk kaing pa yuh, pa ang koe kaing mai can kaing baux mawx baux an.
- (Sh) Jung pwi pa nyawm ot brax kua.
- (Ny) Jung pwi pa laig beenli ceu pwi mawx ceu pwi an.
- (T) Nyiex ot mawh nyiex pa tix / yuh ka mawx.
- (Th) Rawm/ngu shiao mai can kraung khrai ceu pa shiao.
- (N) Krax keh mai krax yum kawn nyawm iak.
- (P) Pa thawk dee ot tix, daux meung/tang meung.

Carang pwi meung jung pwi mai grawng nyiex pa yuh daux 2014 num an mawh pa chix koe bwan son son krax haok huan mai pa koe bwan son been hawt jawh pa sang shiao son kaing krax haok huan khankix heue.

(8.1) Plak Ping Nya

Can ceu pa pon khaing carang pwi meung khankix grawng pa sawg ka carang pwi chix phat chix tiiem lai, mai kawn nyawm gau lai koe mie kaux khankix ex tom sang kieh mawh pa joh jhan ka ceu in khankix pa koe plak greem heue.

- (K) Jung pwi chix phat chix tiiem lai
- (Kh) Jung pwi pa sax ot cawng koe tom hoek mie glawk.
- (Ng) Jung pwi kawn nyawm pa ang pon yaox ti ot cawng.

Can ceu kaing pa pon khaing lox chawk an khankix, mawh pa koe bwan son son kaing pa sang yuh daux haktiex dee ang nyang koe pa gau ping nya, mai dee dah khaix pwi plak pin nya, kheu sang pon baox keut ti yuh kaing pa nie lheu mhawm ka dee an kiied koe bwan son heue. Lox tiag – Vawng ang ah pa ang mawh vawng ang ah, kix tak sang chix keut ti yuh kaing krax haok huan plak pin nya lheu khaing glang ka in heue. Can ceu kaing in khankix mawh pa koe bwan son daux pa cied ti tawng glawg ping nya pa lhaong pa ttiem heue.

khrex rien kraung pa shiao son sang lang sinax kawn, mai lo ti khrex rien kaing pa sang yuh son krax keh kawn, sivoe ang nyang keh, mai khaix hoik keh caw ti cox khrex yuh ka mawx heue.



(8.2) Plak Krax Nyawm Ot

Pa koh ti teei carang pwi meung mawh pa koe bwan son son pa cied ti tawng grawng krax nyawm ot pwi meung khankix heue. Phan tiag cheu ti yaox ka dee ot tix dah mai tix dah mai paox, phan dee ot tix dah nie carang pwi pa yum tan, ex tawng dee an mawh kheu lo plak krax nyawm ot mawh kheu nan caw ti baox sau riang rao ti yuh kaing plak krax nyawm ot tan pa mawh kaing cied ti tawng, cheu ti yaox, kaing pa dha ti khrex, an khankix kieh lih koe ka dee an heue. Awm an phan mawh dee nie koe kawn nyawm pa khraox keh khankix caw ti yuh krax pa priex rien kawn ngie yuh ka mawx, caw ti yuh krax priex rien bon miex keh yuh ka mawx, caw ti khrex rien ti tawx pwi pa koe beeh glawm plak kaing hu tan yuh ka mawx caw ti keut yuh heue. Pa baox keut ti yu kaing an lo ti

(8.3) Plak Krax Kaing Yuh

Son sang pawt ti yaox ka grawng sang kieh kaing yuh ti haok huan, pwi pa pon yuh kaing diag ju kix koe mie ding, mie kaux lo ti tawng kah heue. Vawng simiang mai pwi koe ping nya plak carang khankix, kix tak chix cox khrex kaing ka daux pa pon khaing ceu kaing pa hoik teei carang pwi meung an khankix heue.

Ka daux kaing ceu pa sang keut ti yuh ku ceu khankix pa pon khaing pa teei carang 2014 num an, pa mawh kaing pwi yuh kaing koe yuh ka mawx, pwi pa ang viex daux kaing koe yuh ka mawx, pwi pa ang yuh kaing koe yuh ka mawx, mawh ceu in pa ttiem plak greem tin pa chix tawx riang rao kah heue.

(K) Pwi pa koe daux kaing mai can ceu kaing yuh koe yuh ka mawx.

(Kh) Pwi pa prung prang ti ot pa mawh pwi pa ang koe daux kaing yuh tix, pwi pa ang yuh kaing daux kaing khankix, ju kix, dee ot kix koe yuh ka mawx.

(Ng) Cawng (Phan ang mawh nan) pa mawh cawng ping nya pa shiang tang dah khankix, kawn nyawm cawng pa hoek cawng koe mie kaux, kix hoik, hoik lai gau tix mai pa lo ti pon kaing yuh koe mie ding.

(8.4) Rieang Rao Pa Koe Daux Sibon

Ka piang haktiex in ka daux cub kawn pwi dee koe cub caw khankix, pwi hoik coca ti yuh son koe akhwang sibon ka daux kaing ku ceu, plak ping nya, plak krax ot kawn pwi ku ceu heue. Carang pwi meung an chix kieh ceu pa lo koe son sibon khankix awm in plak greem heue.

(K) Jung pwi sibon hoik khrawm paox tix ku dah dee.

(Kh) Sibon khankix koe riang rao kix plak ping nya, plak kaing yuh, lo kaing pao pwi daux kix yuh ka mawx.

(Ng) Sibon pa kwang nyiex ma tix koe jung pwi mie ding.



(8.5) Grawng Nyiex

Nyiex pa chix koe bwan son son meung haktiex, son sang koe been pa tawx dee ot son an, mai son sang haok huan nyiex pa hoik koe yam in mai son sang grum mhawm can kraung shiao ka daux an, lo ti tawng ka krax ot krax koe mai ka kraung can pa shiao ka daux bawg yam in heue.

(K) Nyiex ot mawh nyiex pa yuh ka mawx: Nyiex ot yam in mawh nyiex pa yuh ka mawx mai kraung pa shiao son nyiex an mawh kraung patix.

(Kh) Ngu Shiao: Lhang nyiex pa pon shiao ka ngu sah mai ngu tang ceu.

(Ng) Pa Pon Rawm Nyaux: Lhang nyiex mai jung pwi pa yaox ti pon nyaux mai pa ang pon koe mie nyiex.

(S) Krax Ot Pwi Ka Daux Pa Singax Plak Krax Nyawm Ot: Can pa lo son pa singax plak krax nyawm ot mai son sang koe krax haok huan daux pa singax plak krax nyawm ot daux bawg yam sivoe ngai.

(Sh) Pa Shiao Kaing Ceu Pa Pon Khaing Carang Pwi Meung Mai Pao Son Kaing Tang Ceu.

(8.6) Shiao Son Tang Ceu

Ex sang chix pon shiao ka carang pwi meung mai can ceu kaing pa pon khaing an khankix son can kaing in kix pa tiiem ti deuh plak greem heue.

(K) Pawd ti tawng mai cied cheu ti yaox ka grawng krax haok huan.

(Kh) Kaing pa pon plih lih mai dee coh cai mai pa sau num ti . Carang pwi meung an mawh pa lo son cub pwi pa tang yuh kaing lah lai cao tix son sang pon plih, son sang koe dee coh cai, mai son sang sau num mau ti daux kaing khankix heue.



9. Kaing Pa Dha Cox Khrex Son Carang Pwi Meung

Can ceu pa dha ti cox khrex son sang koh ti teei ka carang pwi meung an mawh daux pa hoik cox ti deuh son pa dha ti to sivoe son sang grum naog kaing can pa koh ti teei carang pwi meung sax heue. Sivoe ang nyang hoek daux bawg yam carang pwi meung 2014 num sa, kaing pa dha ti cox yuh, mai pa yuh yam in mawh awm plak greem tin heue.

(9.1) Tat Ti Deuh Dee Koh Carang Mai Pawd (Riang Hatiex)

Ex hoik pawd ti deuh riang haktiex pa mawh dee kwang daux haktiex meung man pa mawh veng /yaong/plawg khankix khawmuik heue. Yam koh ti teei carang pwi meung sax pwi koh carang tix kaux caw ti teei beeh glawm koh carang (1) dah, ka daux bawg yam (12) ngaix heue. Grawh grawng pa tat ti deuh dah dee son pwi pa koh carang pwi meung an, mawh pa dha ti sidiang ka son ang sang kieh via mai son ang sang kieh baox brieb heue.



(9.2) Carang Pwi Meung Pa Cheu Ti Yaox

2014 num, yam cox khrex ti deuh son sang koh ti teei carang pwi meung, phan lai ling ti teei carang sax mawh to rug yuh kix awm pa keung ti yuh lieh, ang yuh lie can pwi meung pa rieb ti tawx carang tix khankix, mawh to rug doh rhawm kix ka grawng kaing in khankix lie? Ang doh rhawm lie. Son sang tawng ex grawng kaing pa sang yuh hu sax, tom dha ti yuh pa dha ti cheu yaox ka daux bawg yam 2013 num khix loe (30) ngaix tom hoek 2014 num khix pon (10) ngaix mai laig ti cheu yuh daux plawg (5) plawg mai yaong (15) yaong heue.



2014 num jung pwi mai grawng nyiex carang pwi meung son sang koh carang caw ti shiao ka rieang haktiex 170,000 mu, hoik yuh ti deuh mai in mawh nang pa jhi ex yaox an. (Rieang – Lum kam pha pa sawg mau khri /Pyi Caw Myint)

(9.3) Pon krax teem khaing cao giex kaing khankix mai pwi meung khankix (Tawx krax chix krax tawng mai son kaoh)

Son sang mawh carang pwi meung pa sang koh ti teei in pa grum mhawm pa khaw caw, awm pa lo cao giex kaing khankix mai pwi meung khankix tawng ceu kaing pa sang koh carang in, awm an, cao giex kaing mai pwi meung khawmuik caw ti rom viex tau mai tawx krax teem ka daux kaing an heue.

(K) Can pwi pa tiiem been pa hawt jawh, cao giex kaing khankix mai pwi meung pwi haktiex khankix, son sang lih sidawng kaing pa yuh kix mai son sang sidawng krax ting ceu pa yuh kix.

(Kh) Son sang doh rhawm mai tawng ka grawng pa koe krax ot pwi meung yuh ka mawx, mai son sang chix tawng pwi ka ceu kaing in khankix sidu sidawng.

(Ng) Son sang pon koh ti teei ka carang pwi meung tom grum naog, can cao giex kaing daux yaong khankix cao teem yuh kaing khankix mai can pwi pa hu tang pwi hun khankix, caw ti tawng kaing yuh tix yuh ka mawx.

(S) Sang kieh pwi haktiex khan kix rom ti viex yuh tau daux kaing pa koh ti teei carang pwi meung.

(Sh) Krax kwang haktiex, baux mawx baux an (Meung robrom, kaung pa vieh pa ting, haktiex, viang, baux veng, plawg, yaong) can kawmiti carang pwi meung an khankix caw ti rom viex tau daux pa teei carang pwi meung.



**Mawh Ngie Carang Pwi Meung Pa Khaw Pa Caw Pa Sang
Kieh Meung Haktiex Ot Ex Koe Bwan Son Heue.**



10. Plak Cie Maix

Son sang koh ti teei jung pwi mai grawng nyiex carang pwi meung an kix ka daux 2014 num, pwi khawmuik koe beeh glawm ti yuh heue. Do nie mawh pwi pa viex daux cub simiang, cao giex kaing plak haktiex, cao giex kaing plak been li ku ceu, cao giex kaing ceu pwi ceu mawx ceu an, baux kaung khankix, cao kwang simiang baux haktiex, baux kaung, baux viang, veng khrawm, baux plawg, baux yaong cao giex kwang khankix mawh pa kied ting ceu heue. Carang pwi meung pa khaw pa caw, mawh pa chix koe bwan son son pwi meung haktiex khawmuik heue. Mawh kheu nan, son sang cheung kaing pa koh ti teei carang pwi meung, kix pa mawh cub pwi ting beeh glawm ka daux kaing an mai cao giex kaing khankix khawmuik, khaw ti yuh awm kaing ceu in pa koe plak greem khankix heue.

(K) Can ceu kaing khankix pa lih bleeh khaing carang pwi meung kieh mawh pa tawng pwi haktiex kah.

(Kh) Ka daux cub daux caw, cao maix ang ah, ka daux nyiex ma mai cub caw paox grawm maix khankix, kieh kix tawng ka grawng carang pwi meung (Ka daux carang pwi meung an, kaing ting piang paox tix, mawh pa kieh pwi ku kaux rom ti viex yuh tau heue.

(Ng) Kieh pwi haktiex uik doh rhawm ka ceu kaing pa shiang mai carang pwi meung, pa kieh preed grai ka can lox pie lhen pa ang khaw caw mai carang pwi meung.

(S) Lai satang, sanie zin, pwi meung (Phan ang mawh nan) phan pwi tix kaux kaux chawk ka can lox chawk khawmuik, can lox pawk son lox chawk an uik, pon ti yaox daux plah lai in mai daux lai mhawm ti tawng ka grawng carang pwi meung an heue.

(Sh) Carang pwi meung mawh son pa sidawng pa kriem, mawh son pa yum rhawm pa deuh rhawm mawh son pa pon rieb pwi pa mawh pa tawx lox tiag /peung pa mhawm.



Yam yaox maix ti pon ka lox chawk pa ang chix pawk tix ceu, baux kaung, baux haktiex, baux viang, baux veng, chix ti toe chawk ka pwi koe beeh glawm plak carang (Phan ang mawh nan) lum num ting carang jung pwi Nepyi Daw heue. Lox pa teei bawg yam mai chawk ti tawng nie lheu mhawm khaing lox pa nieb keut ti chawk kah heue. Ceu pa lud yie phai luan, hu nawh, mai kiied nu ti cox heue.

11. Plak Been Sitoe



**Lum Carang Pwi Meung In, Tak Sang Sitoe Ka
Been Sitoe Jheeng Jheeng Heue.**

Lai satang, sara cao giex plak lai sanie zin khankix, pwi ting pa koe beeh glawm plak lum cub caw pa deeh tawx tawng mai been sitee tang dah khankix, cub in khan kix mawh paox grawm tau mai kix 2014 num jung pwi mai grawng nyiex carang pwi meung khankix heue. Son sang pon rwad roi pwi hak tiex khawmuik tawng ka grawng ceu kaing pa shiang pa dex grawng carang pwi meung khankix, sang yuh hu ka ngai lai, tah ting, rieang im, mai can been pa shiang mai been sitee ku ceu heue.

▲
Can kaing pa shiang mai ceu kaing carang pwi meung khankix, mawh daw Khaing Khaing So mai Pao cub caw nawh khankix pa kraix khrawm ti deuh heue.
(Rieang – Cu caw lum kam pha pa sawg mau son kaing jung pwi/Pyi Caw Myit)



12. Lox Chawk Son Carang Pwi

Meung Daux 2014 Num Meung Man

Yam chawk pwi teei carang ka pwi tix kaux kaux, yie chix keut lox chawk an iang, mai lo heue. Mawh kheu lox chawk an khan kix hoik tang koe krax pa bak keut ku gum, mai lox pawk ku gum kawx caw ti mawh lox pa rug pa kriem heue.

Pa koh ti teei carang pwi meung, ceu pa shiao awm lox chawk in plak greem krai grawng ceu pa bak pa keut khankix daux pa dawd heue.

(K) Ceu Kaux

Ceu kaux pwi pa pawk lox chawk khankix, ang lai sau ka daux pa cheu ti yaox mai ka daux carang tang dah heue. Yam koh ti teei ka carang lhang nyiex tix nyiex pa ang krox sau ka carang pwi tix kaux kaux (Phan ang mawh nan) pa lud sau carang ra bawg son ang sang yuh nan, ex tom chawk ka ceu kaux pwi kaux mawx kaux an heue. Lox tiag – phan cao giex kaing teei carang caw/ang caw sang cied ti yaox ka ceu kaux kawn nyiex ma an heue.

(Kh) Simex/bon

Chix pon tawng ka jung pwi simex mai bon

heue. Lox tiag krax ot pwi simex mai jung pwi sibon, krax im ju kix, (phan ang mawh nan) krax pa haok huan plak ku ceu, chix ti tiag cheu ka paox son sang tawng kah heue. Krax pa gwieh ti tawng krax ot simex mai sibon, mawh pa kiied ting ceu tete heue. Khaix hoik plih grawng kaing pa teei carang pwi meung lih, ex tom baox chix yuh kaing pa cied cheu ti tawng grawng ku ceu heue.

(Ng) Ju

Baux ju mawx baux ju an, yam teei carang tak sang kieh mawh pa tat ti tawng grawng pa haok huan jung pwi miex ding heue. Ka daux meung tix meung koe jung pwi mie ding, baux ju mawx koe mie ding, mai caw tip on tawng ka grawng jung pwi koe yuh ka mawx heue. Lox tiag – phan hoik pon ti tawng ka carang pwi pa koe ju (5) num pa koe greem (5) num daux vawng tom chix tiag ti tawng ka daux num pa sang hoek daux bawg yam pa an got rheung tom nie, caw ti cox khrex nyiex cawng gau lai mie mu, lawg gau lai mie lawg, sara cao gau lai mie kaux ang ah chix ti bak



sawn yaox kah heue

(S) Shiang mai Cao Giex Kaing Nyiex Yuh ka Mawx

Son sang pon tawng diag krax ot krax koe nyiex ma mai grawng nyiex ma an khankix, lo ti tawng mawh shiang nawh mai cao giex kaing nyiex ma yu ka mawx, an mawh pa ting ceu heue. Grawng pa ting ceu an, mawh kheu kieh ex tawng grawng krax ot kix daux nyiex maix, mai kieh ex tawng krax haok huan koe daux nyiex ma an mie ding heue.

(Sh) Krax Ot Krax Koe Nyiex Ma

Krax ot krax koe daux nyiex ma, mawh pa shiang mai krax pa keh kawn khankix heue. Phan krai dee sidawng mawh kheu lha koe nyiex ma nawh, krax pre jung pwi chix yawm hu kah heue. Phan tiag ti tawng ka meung pa koe piang haktiex khankix, jung pwi sibon pa hoik yuh kapaox lheu nie krax keh kawn kix khaing jung pwi sibon pa ang nyang yuh ka paox heue. Baux ju sibon tix kaux pa keh kawn bawg jah tix bawg, ju nawh yam jah nawh ti keh kawn an, chix kieh tawng ka ceu pa baox keh kawn nyawm nawh mie ding heue. Sibon pa keh kawn bawg jah yam hoik koe ju nawh (30) num, mai sibon pa keh kawn bawg jah yam koe ju nawh (20) num, mawh sibon pa koe ju (30) num pa tux keh kawn tix heue.

(Ny) Been Li Pa Krub

Been li pa krub mawh pa ting ceu son pa tat ti tawng been ot kawn pwi pa ang situ awm paox tix heue. Mawh pwi mawx pa mawh pwi pa yuh ka mawx, chix ti tawng ka been krub nawh heue. Can pwi koe been krub khankix, mawh pa kheem ka jung pwi mai been yungyi mai krax yum rhawm pwi heue.

(T) Pwi Ceu

Pwi ceu khankix mawh kheu been yungyi



kix, kix pon tawb kheem ka paox plawg paox nyawm ka been krax ot tix heue. Dah dee dee ot tiblah, jung pwi haktiex dee ot kix, kawn lheu, tux khaing haktiex dee ot tang dah, pa yuh nan ex tawng grawng mawh kheu ang ceu pa awn kix been ot tix ang situ heue. Son sang chix tawng ti cied cheu ka krax ot pwi ceu mawx pwi ceu an, chix ti tawng ka ceu kaing pa hoik pon khaing kix heue. Nie lheu mawh ka grawng ceu pwi an yuh kix ti koe nyiex ma yuh ka mawx, thawk theng kix dee ot tix yuh ka mawx, krax ot kix plak ping nya, kaing yuh kix koe yuh ka mawx, ceu pwi pa prung prang ot dex baox an khankix, koe yuh ka mawx, cub an kix tieh lox krax keut kix yuh ka mawx, mawh sawn kix tokaux cao kix mawh pa yuh ka mawx, pa koe krax tieh loh an khankix chix kieh koe krax pa pon sawg cied cheu ti tawng ka krax ot pwi heue.

(Th) Krax Ot Plak Pwi Pa Ang Grum Pak Peung

Lox chawk son pwi pa ang grum pak peung, koe jung pwi kix mie ding, koe ju kix mie ding (Baux ju mawx baux ju an), jung pwi pa ang grum naog pak peung, dee ot kix ku dah ku dee mai lo kix ka ceu pa tix chix ti tawng kah heue.

Carang pa teei ex in, mawh nang son sang keut ti yuh kaing teei carang pwi pa ang grum naog pak peung, mai son sang pawd been hawt jawh pa shiang mai pwi ang grum naog pak peung khankix heue.

(N) Lox Chawk Pa Shiang Pa Thawk Theng Mai Loh Dee Ot Tix

(Krax bak keut son baux veng dee keh, baux

veng dee ot jheeng, baux veng dee ot yam jah).

Ceu pa pon khaing lox chawk in khankix, mawh pa kieh ex pon ka grawng krax pa thawk theng dee ot dee koe tix heue. Do nie kieh pon grawng ceu pa thawk theng dee ot daux yaong mai daux veng heue.

Can ceu kaing pa pon khaing carang an khankix, haktiex pa koe daux meung man khawmuik, caw ti koe krax haok huan daux bawg yam sivoe ngai yuh ka mawx mai caw ti sum kieh kaux cong yuh ka mawx, koe bwan son daux kaing an khan kix heue.



yaox ka koe pwi yuh kaing mie ding, pwi ang koe kaing yuh koe mie ding khankix heue. Ka daux bawg sivoe ang nyang koh ti teei carang pwi meung been tix num, can kaing kaing pa yuh khawm uik an, maw pa kieh tawng ka pwi haktiex pon kieh yuh tix tix num mie ding heue. Can lox chawk pa shiang mai kaing jhaw pa yuh khankix, mawh pa kieh tawng ka kaing yuh pwi haktiex simex/bon ju mai ping nya khaw caw yuh ka mawx heue. Can ceu kaing in kix khankix mawh kieh vawng pa giex kaing ting khankix tawng ka can kaing pa ang awm paox tix pa ang pawt ti deuh son bawg yam pa sang hoek heue.



(P) Lox Chawk Plak Ping Nya

Lox chawk in khankix, koe pwi chix lai mie ding, son sang keut ti yuh kaing gau ping nya son pwi haktiex uik, son baux haktiex baux mawx baux an, son baux ju pa iak pa ting baux mawx baux an ang ah, mawh pa koe bwan son heue. Carang pwi meung, mawh pa kieh tawng ka haktiex pa koe daux meung koe mie ding, been gau ping nya koe yuh ka mawx heue.

(Ph) Krax Ot Krax Koe Plak Lah Lai

Carang pwi meung in mawh pa tiag cheu ti

(M) Lox Chawk Pa Shiang Nyiex Mai Kraung Shiao Son Nyiex

Lox chawk in kieh ex tawng grawng nyiex mawh nyiex pa tix, mai pwi daux nyiex khankix koe yuh ka mawx heue. Ka daux meung man koe nyiex ma mie ding, krax ot nyiex ma mai krax lah krax lai koe yuh ka mawx, krax pa pon shiao pa rieang ngu, mai rawm nyaux rawm shiao koe yuh ka mawx, yam yuh priex preem shiao khix ngu ka patix, mawh shiao nyiex thang ka patix, ceu in kix mawh pa sang pon tawng khaing carang lox chawk khankix

heue. Can ceu kaing pa hoek tiiem ti deuh plak piang khankix mawh pa chix kieh vawng simian cao giex kaing tawng diag krax ot pwi meung plak lah lai mai plak ku ceu heue.

(Y) Daux Nyiex MA Singaix Pa Hoik Luan (12)

Khix Koe Krax Yum Yuh Ka Mawx

Lox chawk in kieh ex tawng pwi kwad riex ju koe krax yum yuh ka mawx heue. Nie lheu mawh ka sibon pa koe kaux koe krax yum mie ding, pon ti tawng kah heue. Can ceu an khankix mawh pa pon ti tawng grawng daux meung tix meung, caw ti baox ghaok ti yuh krax haok huan ka daux meung son pwi haktiex mie ding, in mawh saw pa ting ceu tix ceu heue.

(R) Pwi Meung Man Pa Hu Ot Ka Daux Meung

Tang Meung

Pwi meung man pa hu ti ot daux meung tang meung (Phan ang mawh nan) jung pwi pa hu yuh kaing khankix mai grawng ceu pa shiang mai pwi an kix khankix, caw ti koh ti teei carang kix heue. Yam in mawh kheu hoik blang krax ot ka daux meung man, can



kix pa sang deeh hoek ka daux meung man, grawng kix koe yuh ka mawx, tak sang keut ti yaox ka piang lox pawk pa hoek khaing carang an heue. Lheu khaing an, can pwi tiblah pa lih hu khaing meung man, sang cied cheu ti tawng kix ka ping nya pa raux pa mox, phan kix deeh hoek, caw ti kieh kix yuh ka mawx, can kaing an khankix, chix ti shiao ka carang lox deeh pawk an kix heue.

13. Deeh Plih Pwi Tawng Grawng Carang Pwi Meung



Can ceu Kaing pa pon khaing carang pwi meung pa teei 2014 num an, tak sang yuh carang kriem, tak sang khrex rien cied cheu kah, tak sang plih pwi tawng, ceu an khankix sang priex ti deuh ka cag thawng rieang, cag dong, mai kix pwi pa min pa chix grawng kaing an, tak sang yuh hu heue. Can ceu pa pon ti tawng khaing carang pwi meung an tak sang yuh tom pon ti plih lih ka daux bawg yam pa tat ti deuh heue.

- a) Lai tang son carang pwi meung pa jah bawg jah an tak plih pwi tawng daux 2014 num khix sidaix heue.
- b) Lai carang pa ghoik ti yuh an tak sang plih pwi tawng ka daux 2015 num daux khix tix heue.
- c) Can lai pa pon khaing ceu kaing an khankix tak jah ti plih pwi tawng jah ka daux 2015 num khix tix hu sivoe heue.

14. Simin Pa Shiang Mai Carang Pwi Meung Daux Meung Man 2014 Num

- Can mau pa uik son pa teei carang pwi meung in caw mau Amerikan 58.6 lan heue.

Yam in krax pa uik son krax kwang krax khrex ku ceu vawng meung man hoik sau mau Amerikan 15 lan mai cub caw pa sawg mau son jung pwi lum kam pha pa mawh cub (UNFPA) lheu khaing mau pa uik son krax bung kwang kaing, kawn baox teem mau Amerikan (5) lan heue. Can meung tiblah pa teem gaw daux kaing in pa mawh meung Awstelia, Filan, Jamani, Novoe, Briten, Suidin mai Suisilan mau teem khaing an khankix koe mau Amerikan (41) lan heue. Lheu khaing an Kameda, Iyu, Japan mai Itili khankix kawx, kix kawn keut ti sang teem heue.

- Can pwi pa sang shiao daux kaing teei carang pwi meung khankix pa bak keut ti deuh mawh jung pwi tix shien pon mheen kaux heue.

Can pwi pa bak ti deuh an, pwi teei carang ti shien (100,000) pwi cied carang (2) mheen (20000), pwi daux num ting mai pwi daux dee yuh kaing cao gau khankix khawmuik koe (5) rheng heue.

- Yam in ka daux pa teei carang pwi meung in mawh pwi pa koe ping nya pa kaoh khaing (15) meung pa viex ka daux an heue.

- Rieang haktiex pa shiang mai carang pwi meung bak ti sang yuh lih (170,000) plah heue.



- Dee sang koh ti teei carang pwi meung ka daux meung man khawmuik koe (100000) tix shien dah heue. Ka daux bawg yam pa koh ti teei carang pwi meung, can pwi teei carang khankix son sang pon khrawm kix ka dah dee an khawm uik tak sang teei carang khawm uik heue. Ka daux bawg yam pa koh ti teei carang pwi meung, tak sang pon ka rieang haktiex tom ka iak khankix heue.
- Carang pwi meung 2014 num an, hoik yuh ti deuh lox chawk (41) mu mai yuh plak lox man mai lox kala paing plak lox ra ceu heue. Viang mawh nan can pwi teei carang khankix kix tak chawk maix ka plak lox haktiex dee ot maix heue.
- Yam in carang pwi meung pa koh ti teei in, mawh pa sang pon tawng ex ka can jung pwi meung man tom khaw caw heue.
- Ka daux meung man koe lhang nyiex (11) lan heue.



Mawh Carang Pa Koh Carang Pwi Meung Son Sang Viex Jung Pwi Pa Koe Daux Meung Man Ku Kaux, Mawh Pa Ting Ceu Heue.

15. Lox Ghoik



Pa koh ti teei carang pwi meung in mawh kaing pa ting pa vieh tix ceu, mai kiied su sak tete heue. Mawh kheu nan simiang vawng khankix mai cub caw pa yuh kaing haok huan mai pa rom paox ti yuh tau mai pwi ting pa koe beeh glawm plak carang pwi meung, son sang grum naog kaing in awm pa coca ti yuh kieh mawh pa mhawm, pwi meung pwi haktiex khawmuik kawx, caw ti rom paox tix tau mai yuh hu heue. Phan in (2) ceu grum rhawm ti yuh hu, tak sang koe pa grum naog heue. Krax pa bak keut son pa teei carang pwi meung an, maw pa koe bwan son, phan pwi meung grum tawng ku kaux, pwi ku kaux tak sang pawk ka daux pa khaw pa mhawm, phan yuh nan krax pa teei carang pwi meung in tak tawng grawng pa koe bwan son nawk heue.

Ka daux bawg yam pa teei carang pwi meung, can pwi meung khawm uik caw ti rom viex tau daux kaing an, mai son sang rom ti teem ka pwi teei carang, in mawh lox pa khiox khaw cub caw ting pa kwang khrex ka carang jung pwi mai riang rao pwi haktiex heue. Son sang kaux cong mai son sang koe simie pa mhawm daux bawg yam pa sang hoek, ka daux meung man, kieh ex rom ti sau riang yuh tau kaing teei carang pwi meung heue. Krax pa grum naog kaing pa teei carang pwi meung in, mawh pa sang kieh kaing krax haok huan ting lhaong ka daux meung ot tix, mai son sang koe krax haok huan in, lo ti kieh carang pa sang teei khankix koe krax pa khaw caw mai pa grum mhawm heue.

Ka daux 2013 num, pa cheu ti teei carang pwi meung yam teei kix carang pwi teei carang (5) kaux. Cao pa kwang kaing cied carang Yieux Ti Ta Myin.
(Rieang – Lum kam pha, cub caw pa sawg mau son carang jung pwi, Pyi Kaw Myin)

Phan Lo Ti Baox Tawng Ceu Kaing Pa Iak Pa Liied Khankix:

<http://www.dop.gov.mm>

<http://myanmar.unfpa.org/census>

